

MIKGITOKRANGNI A·DOK

(..... amani rongjanggina dikbusruo
merong jakkemsa donmangmangakode
gosresrana nangjachim..... !)

Kandikgipa Achik Dakmesokani
(Short Drama in Garo)


Senokgipa;

Barnath A. Sangma, B.A. (Garo Honours)
Nokil A·Swe, Williamnagar.

MIKGITOKRANGNI A·DOK

..... amani rongjanggina dikbusruo merong jakkemsa
donmangmangakode gosresrana nangjachim..... !)

Kandikgipa A·chik Dakmesokani
(Short Drama in Garo)



Senokgipa,

Barnath A. Sangma, B.A. (Garo Honours)
Nokil A·Swe, Williamnagar.

Sechengani : - 2007
King : - Hajalsa

Sechapa ka:atgipa:- DIRECTOR,
ART & CULTURE
DEPARTMENT
MEGHALAYA, SHILLONG

*Ia chonbegipa Dakmesokani kitap, angni
skanggipa depante Atchio Jakgitel Dekkim Bajakra
Konal Marakni January 26-0 aro gnigipa depante
Atchian Salario Cheande Babra Koknal Marakni
December 25-0 atchiani salko gisik rāaniaona
ongchina.*

DAKMESOKANIO BAK RA·GIPARANG

Kalim : Chadambe dolni dilgipa
Ringanchi : Kalimni jikgipa
Pangkim : Kalimni ripeng
Jengku : Chadambe dolni dilgipa
Bakkam : Chadambe dolni dilgipa
Singkam : Pangkimni ripeng
Ringanchi pagipa aro ma'gipa
Pekgipa aro Kore
Norime : Ringanchini ripeng
Rakseng : Ukil
Jakkam : Chadambe dolko dilgipa gitcham
Songni Buchuma
Songni me'apa sakgni

DAKMESOKANIONAKATGIJABIMUNGMANGMANGCHI BAK MAN·PAGIPARANG

Kalinni nogipa aro uni segipa
Kalinni jonggipa
Brengja, Roka, Akrem : Membor chakatgiparang

JANAPCHENGANI

Bang”a ki-tap segipa sakan-tian dingtang dingtang a”gilsakni ong”a obostaranko ra’e uko jinmani mikkango dakmesokate namdapataona ra’bana miksonge setoka. Apsandake ia angni skanggipa dakmesokaniko seanio angaba apsan miksonganionan ong’achim, indiba chong-motgipa gisiko chanchianiko donmitape anga iano kandikbee kosakgilgikosan mesokaha.

Ia dakmesokanio anga darang a’sakni mandena ong’chongmota obosatako ra’e sejaha aro darang mandeni bimungko ba uni kam cholonko nirikkie seanikoba dakjaha. Indiba maihakai badiabarango apsan apsan dakangode uan ong’gakanisan ong’aigen.

Anga angni sea-jotani a’bao re-mikkangengon na-simangni dakchakachi kinggni (SIKKIME aro WAL-MINDIK A’GILSAK) novel-rango chusokgipa ong’aha aro da’o ia Drama-ko seanioba na simangni dakchakaniko nisamsoenga.

Pilak angni se-jotaniko namdapatna na-simangni jakoan onga aro saoba ia segimin dakmesokaniko namdapatna angna ku’patianiko on’atgenchimode anga uko mitelbegen.

Bon kame ia dakmesokaniko bimang ong’atna kam ka engmitingo angna dakchakgipa Dr. Caroline R. Marak, Head of the Garo Department, NEIU. Tura-ko gisikni u’isokgijanirangko talatdape namdapatna dakchakanina uko dingtangmancha mitelna namnika. Apsan somoion bang’a dingtangdingtang nanganirango dachake iako chu’sokatna dakchakanina Sengjirang N. Sangma, Department of Garo, Rongrenggre Govt. Higher Secondary School, Williamnagar-ni Lecturer-koba mitelna namnika.

MIELA

Barnath A. Sangma, B.A. (Garo Honours)
Nokil A’we, Williamnagar.

DAKMESOKANI-I SKANGGIPANAKATANI

(Biap: Songni bakra rikamjoljol songona rama re'pakgipa sambuu Kalim saksan asonge grapenga. Unomiting Pangkim jako aditu lekarangko rare songona dakbagipa ramako re'bae uko nikea)

Pangkim:- *(Adita chel kalaoni)* Aia mainasa na'ade saksan grapenga?' (Kalim mikjrao dake nisoa) Aia, na'ara grapbebengama, angade da'siode balekesa roatengachim, maiba ong'ama? *(Gingting rimpe)* Hing! Na'ara chuba ringama?

Kalim:- Angni dukde dal'beade ong'ja, indiba A'chik me'tra saksani kakket dakgijanichi anga chasongnaba dangtapkugijagipa peggipa bostuko besa kana nangaha.

Pangkim:- Oh, A'chikna ka'sagipa jatni depante, na'ra mejalo gitok jardil napile chadamberangko mikkangchake re'dile, jak goe a'songna chrikdiligipa, da'alo me'chik saksana chu ringe goka dake grapengama'?

Kalim:- Oe, ripeng ua mejalni Kalimchim; indiba da'alni Kalimde indake kalimaengjok! Mejalo noksulni manderangba pangna chu ringpagijagipani peke re'angako niksoe suk ong'tokjaenga.

Pangkim:- De, na'ra antangan ia pilakko urieba, ukon dakaiode sawade suk ong'chakpagnoksa.

Kalim:- Kangale atchigipade pilakko dakon kangala da'ogita maiba mingsako dakna chanchipaoba miksongani chu sokjajakon dakronggijakoba dakatman'aia.

Pangkim:- Maina na'ara dositangko kangalatango pakjrake namgijako besa ka'enga. Sawade kangale atchija, angaba apsan nang'gitan kangalni depanteanba.

Kalim:- (*Rake kik-kike grape*) Inghing, kangaloba na'ade anggitade dukchakkujaenggen. Salsao anga an'tangna ong'gipa obostako da'alonaba gualkuja. Unsalo chinga migrichim, anga angni jongtangko jatang wate notangko debrae okkria amjae ai-babamangni hajira kam ka'ako sandimitingo ramao manderangni ga'dapgimin te-brong bitchil rongsako nikaha. Ua te-brong bitchilara tongsade a'ningo aro tong'sa a'kosako nadoe dongachim. Uko ote so'e an'tangba cha'pana inora angni nogipa aro jonggipan okamanjae una jegrikpilaha. (*Pile rake denggoke graptaia*).

Pangkim:- (*Kalimni pakkreo rime*) Oe, beben angade kangal inoba namkalbatbebe-kuenga, cha'a raja cha'diljaoba angni ama-apade angni u'ibachengaoni da'alonakingkingba mi patisaba okumude chakdilpakuja. Hai ripeng angbaksa dikdiksa re'jojoe roe gisik tom-tomatbo (*Sakgnian re'anga*).

DOGA CHIPA

DAKMESOKANI-I GNIGIPANAKATANI

[Biap Cha dokano: Kalim aro Pangkim cha dokan ge-sachi napangaha. Uamangni napangmitingo chu pekgipa aro kore (pagla) saksa cha ringsoenga].

Pekgipa:- (*Cha ringe ringchakaniko rake ontime*) Haaa, angko seng'a dakenga angko. A'chik a'songo A'chik gangbo dakjaode sawa gangbo dakgen. (*Kore-chiko nie uko jaksi ote*) Ongama, ongja jong.

Kore:- (*Jak-o go'ol rabbitachi mikkango dokdingdinge*) Na'a iano belbeldamnabe, chupekgipa kat bakbak ianoni kat.

Chupekgipa:- Oh, na'ara paglasa (*Chakate mamungkoba agandapgija re'anga*)

Kore:- (*Asongaoni chakate reroroe*) Chu ringgipakode angade namnikja, chude namja senga.

Dokan Nokgipa:- Namjok sala, ia pekgipani hala ka'anan cha ringna re'bagiparangba ong'kate katokpilengjokchim. Ramao re'jojogipa paglaba indakgiparagnade tik ong'skapilade.

Pangkim:- Nibo ripeng, namgiparangni arikgalna manpilgijagipakoan pagla katatna man'pila. Iana na'a name chanchie niode, chu pekgipara ramao skatang re'jojoe belbelgipa paglanamangba bate nambatja ine nikna mangel.

Kalim:- Oe, ripeng angaba antangan namja inen u'ia indiba na'ade angko ua me'chik saksana ka'samangmangari peke grape roenga inesa chanchiengama?

Pangkim:- Oe, unanba kattako tale agane nichengboda.

Kalim:- Na'aba A'chik saksa onge iako u'ia. A'chikrang "A·KING" aro "ME·CHIK"-chisa jatko ripinga. "a·king" uan an·chingni a·dok-chiga aro uko nirok sandina me·chikko nokna ba'a jekon "me·chik" ine agana. Iani gisepon an·ching me·chik ma·bonatode, sawa a·kingko nirok-sandigen?

Pangkim:- Oe, onga ong·ade, indiba na'ara da'o iarangko maina aganskaenga. Na·ade da'oba mikmakan talbrekujaengakon.

Kalim:- Jeko agana skangba kattako bon'e knachengboda.

Pangkim:- (*Kardingsmite*) De aganbo, knaengaba.

Kalim:- Da'ode iani gisepon, A'chik me·chik saksa rori panteko mikchaengachim. Ua rori panteara poraia skia man·beaba ong·ja aro gisik name chanchigipaba ong·taija. Uni gimin uko skie rapaora, 'indide na'a angko ra·skagenma?' inesa angko ua sing·skaaha.

Pangkim:- A'iao, maidakpilgipa me·chiksajokai. Na'ara una maiko aganchakskajok?

Kalim:- Anga maiko dakgen, antangan iako che·latna sigkiparangoni saksa ong·pani gimin janggitangko ua kamnan boli on'a nangaiaha. Aro nibo ripeng da'alo ua apsan me·chikan sakgipin rori panteko seke katangtaimanjok.

Pangkim:- Indakaia oe, ripeng. Unan angade nikoba nikja dake jriprjip rosrangaia.

Kalim:- (*Sko narongrenge*) Nanggita, anggita u'ikalgipa sakantian indake jriprjip roaiode sawasa jatna kamko ka·skagen.

Pangkim:- De, na'a jatna kamko ka na kang-kare kamanchaa ongode maina indake ringe cha'e salko re'atenga. De, batesa na'a an'tangni chusokgijanirangna gisiktango ra'bianiko dakbo.

Kalim:- Anga skangoba ringja ripeng aro da'alna agre ringtaijawaha. Dasio pagla angna nama dakmesokaniko on'aha. Anga siaonan uko gisik ragen.

Pangkim:- (*Lekka ra'bitatangko tarijoljole*) Ringtainabehe oe, manderang chu ringachi neng'nikatangko gimatna ma'ra ine agana. Beben mikmakmitingo aditan gualnaba donga, indiba mikselpilahaon bachina, uan apsan ong'pilaigen.

Kalim:- Bachinasa na'ara lekka ra'bite re'angskaa.

Pangkim:- Sorkarini kamna porikka se'na re'anga.

Kalim:- Maratama?

Pangkim:- Im, sing'a kakketkode bon'en man'ata, man'atade.....

Kalim:- Saoba manderangko rime niama?

Pangkim:- Inghing, chu'ongagita uamangna tangka pa'isa duna dongode anga kamkon amjawachim. Hai, re'nahama?

Kalim:- Hai re'bo. (*Sakgnian re'anga*)

DOGACHIPA

DAKMESOKANI-I GITTAMGIPANAKATANI

(Biap: Pangkimni Oppisni cha dokano. Pangkim kamna porikka rranio chusokgipa onge kamko manaha. Ua Singkam baksa cha ringna re-angaha. Unomiting Ringanchi uno cha ringsoenga.)

Pangkim:- *(Ringanchiko niklate nawang dake)* Bachinisa Ringanchi?

Ringanchi:- *(Cha ringa matchotsoe, jajaa gnang)* Songchini daosa re-baenga. De, na'song ringbabo angade re'skanaha. *(Pakkreo kebitgipa bekoniko tangka bikote chain damko game re-anga)*

Pangkim:- De, indakode.

Singkam:- *(Ringanchiko nirike)* Sawachimsaimo, iara.

Pangkim:- Iara na'song Oppisni sahebni demechik Ringanchiba. Mejaode bikora sakoba roriko seke katanga ine knaachim. Binara Kaliman ka'sachimba. Ia mechikan tik dongja.

Singkam:- Badia Kalim, ia archingni Kalimma?

Pangkim:- Oe, na'a ia dao chadambe dolko dilenggipara.

Singkam:- Aiao, ia mandeba seng-ade seng-bebeamo. Bangbata manderangan binade kenade. Gipin dilgiparango toede biade kamba kaa aro gimiknan choliaba cholia danang.

Pangkim:- Uuh, bilonga biade. Ontisamang ong-gija dakenga ine nikahaode sikap tangkap dakaigipasa. Indiba ontisa bio chakchikani gisik dongbreja.

Singkam : Bisongni nokdangba inditana cholibreade ongjakonde.

Pangkim:- Aiao, maiko agangen, tole aganode archingni nokdangan nambatkalkuenga. Indiba daode aditan cholikalengakon. Uchi nogipa

saksa dongpagipaba kam dongakon segipa manjok, jonggipa Primary skulni masterr aro daode Kalim antangba songni skulo ka'e roengakon.

Singkam:- Mejao angna saoba bini ma'apakoa sijok ine aganachim.

Pangkim:- Oe, siahaba, indaken Kalimsa hajira-monjira dake nogipa jonggipako poraiata.

Singkam:- (*Pangkimni jakko surdike*) U-u-it, ua Kalim nang'chi re'baenga.

Kalim:- Mai dakchimenga?

Pangkim:- Cha ringna ong'katbaesa rojojolaenga, na'ara bachinisa?

Kalim:- Sko ding'anasa re'jojoe roatainga.

Singkam:- Maina chanchiesa sko ding'simaia, maiba ongama?

Kalim:- Maiko agangen ripeng. Aganoba mandeskako matnange roa gita dakaia. Na'aba Jakkamkode u'enggen, sala skango an'chingni chonchonmitingode sal rakako raka minggija gitok rane okria chiot chiot dakako done mikkango dile jatko cha'bokgiparangni bimangko tarie re'jomae so'e galdilachim indiba nibo da'ode uamangan a'songni silroro-namrorogniko bon'attokenga.

Pangkim:- Indaktokaia oe, (*Sko siksike*) Oh, na'a Ringanchiko grongjok?

Kalim:- Im, biko grongen, biming golpobaen ru'utbajok.

Pangkim:- Da'gara mai ong'jokna, na'a singe niama?

Kalim:- Mai ong'gen, jegita ong'na nangachim uagitan ong'jok. A'bachengaonin angan bikora aganpachim, indiba bian knachakja. Da'ode segipakon gale katbasrangjokna.

Singkam:- Mainasa antangan namnike re'angeba da'ora katbaskajokai?

Kalim:- Biko rimangani attamon, banoniba mahajon dal'dalgiparang nokona re'bae A'chik me'chikko jikgipa man'jok, da'ode an'chingni miksongako chu'sokatnade nangni jakonjok ine tangga go'brake on'ako nikdike tangkanasa dakakon ine walon sriksrik gale katbaana.

Pangkim:- Namjok, indiba da'ode bikoara sawa ra'kugen?

Kalim:- Angara, angan ra'gen. Angade jikgipakon ranan sikkjachim, indiba ambin bilgrijoko sawa nirok-sandigen inesa ra'na amaenga. Unbaksana angade saoba an'tang gualachi dal'bea dosiko dakgualgimin me'chikkon sandienga, jedakode dakgualgiminna sikkimpile segipana kakket ka'sagen.

Singkam:- Da'oara bachi, nokchin re'angama biara?

Kalim:- Bani, pagipana kenen nokchide re'angjahake. Ang' nokchisa re'angenga.

Pangkim:- Na'aba nokchakade nokchaksokuaiamo?

Kalim:- Maina nokchakjagen, Gitelanba indake branggipa de-ko nokchakchinan Rongtalgipa Kitap rangoara toe skianirangko on'manahaba. (*Pangkim aro Singkam nitatgrike kadinga*). Na'song roangkugenma, angade re'ainokon.

Pangkim:- Chingaba re'ainok. Hai an'chingba re'ainok Singkam. (*Sakgittaman chakate re'anga*)

DOGA CHIPA

DAKMESOKANI-II

SKANGGIPANAKATANI

(Biap: Pangkimni noko, Kalim Pangkimni nokchi rona re-anga).

Pangkim:- *(Kalimko niksoe)* Ai, da'alde bachinasa. Angade nang-kode jikgipa ra'en nokonin ong-katjaengjokma inesa?

Kalim:- Aiao na'ade indina dakpabo. Angasa anga uriaengjok, man'e cha'gipani demechik ma'atbebeaia. Mi-bijak songnaba changja, pringoba anga demesajaode chet bajirangosa chakataia, aro on'tisa kamrangna waton nengana ma'amaia.

Pangkim:- *(Kadingsmite)* Na'aba ukoara uriaenga, man'e cha'gipa rike donggipa baksa kangale janggitangbapagipamung maidake meli-ma-gapagen. Da'ode na'songde saksa sakgipinni janggi tangani bewalko nigrike tik ka'grikna bangen nangkugen.

Kalim:- Oesai, angade unan basakobade krachaeba nikangpilaba. Kangkalni janggi tanganiara kangatangon bonaia indiba man'e cha'gipara man'e cha'a bewalon dintangmanchasa.....

Pangkim:- Pagipamangara nasongkoara kobor man'jokma?

Kalim:- Im, mejalo chinga sakgnian re-angaba.....

Pangkim:- Mai, bisongara namnikaiaama?

Kalim:- Namnikjaoba demechikgipan dosi dakahani gin.in maiko dakugen. Demechikgipako ma'apanikri agane-skie on'ana agre maiko dakpana man'kugen, aro angko sorkarini kamko am'e ka'bo, angaba ama dipetde dakchakate nigen ineba aganatenga.

Pangkim:-Nang-ko chadambeni dolko dilenga ine u-ijaesa biade sorkarini kamko ka:china aganenggen.

Kalim:- U-ipaesamba angko ua kamoni ong-katkan aganachim, indiba angara Ringanchini angchina katangani attamon dolni karimskarangko rang-gitik tom-ate ong-katjok.

Pangkim:- Maina na:ara ua kamko watjokai, ua dolni padot ong-kuon maiba janggi tangani cholrangkode mangenchim.

Kalim:- Dakgimin aro dongimin niamde bachina aro unbaksana me:apa ong-e chadambeni kamko ka:aniara krabeaniba ong:ja.

Pangkim:- Da:oara nangni biapoara sako songskajok ?

Kalim:- Sa-ko songgen, Jengkukon songaijok. Angni dolni padot ongmitingo bian angko dakchakgipani kamo ong-achim.

Pangkim:- Dolni jakrikrade ?

Kalim:- Jakrikrade Balkaman ong-kuenga.

Pangkim:- (*Golpoko dingtangible*) Chakchikna man:ode sorkarini kamba namaia. Bang-e jele man:pajaoba jagimikgimik nichake je man:pako cha-e-ringe tom:tome janggi tangna man:kala.

Kalim:- Aiao, kam sandinaba student union-o dongmitingo jegriksimanan angnade kamkon on:ama on:jawama. Bebegita man:bebeoba angade mandikgenkonsai.

Pangkim:- Man:dikoba maiko dakgen, janggitangnade cholkode sanditelnan nangaigen aro na:ade sandibeeba ong-ode altutuan man:aigen. Nang:gita sorkariko jingjengatgipa mandeko nokchakjajokode, tolasa ong:ainok.

Kalim:- Maidake altue manpanokai!

Pangkim:- Maidake manjawa, man'a ongode nanggita
dakgiparangode antangtangni ning'o napate jripatnasa jotton ka'gen.

Kalim:- Haida, jamano somoi sokjoko nie niainaha. De, na'a roaibojok,
angade reskainaha. Uchi Ringanchiba saksan aratsonok.

Pangkim:- De, indake ongode re'angbo. (*Kalim Pangkimko wate
re'anga*).

DOGA CHIPA

DAKMESOKANI-II

GNIGIPANAKATANI

(Biap: Kallimni nok : Kalim nokona re-bapilengchim, unomiting Ringanchi ripengtang Norime baksa noksamchi morao asonge maikoba golposobenga. Kalim uamang sakgnini jakgitele golpoako dondikatna sikjae jrimjrim turamchi re-ange tugrange roeaha).

Norime:- Nangkode da'ora skangona bate ram'batroroesa nika. Na'ara saengama?

Ringanchi:- Oejok, ripengska gimikan ram'a, ram'a intokanan krachae nikangpilengjok. Maidaken ram'enga, sade sajachim na'a angara.

Norime:- Ma, gisik suk ong'gijanirang dongama?

Ringanchi:- Gisikde suk ong'aiachim ongade.....

Norime:- Hat, indakode na'a cha'a-ringarang tik ong'jaengakon.

Ringanchi:- Cha'a-ringarang tik ong'ja ine aganoba segipako matnanga gita dakaia. Maiko dakgen jenaje donsoa, uchi ai-mangchi dongmitingoara nakam ingipakode babaan namnikjoljani gimin ra'napja aro dali ingipakode angade janggi tanga gimikan cha'jolvachim indiba da'ora jeko segipa ra'baa ukon cha'pana nangaijok.

Norime:- Nokrangkode rotonikaiama?

Ringanchi:- A'bachengmitingode rosiksake nikachim indiba da'ode rote rote name nikangpilengjok.

Norime:- Angaba unan kensoengasai, da'o nang'gita nokjam donggijagipa nokdangoniko mangakjokode aro anti-a kang re'pana inoba gari-gora dongajokode ripengskanaba krachagen.

Ringanchi:- Angade uarangni giminde bange chanchija. Ama-apani gamde uamangnisa, da'ode angni gamde ian, jekon angni segipa ka'sae angna dakenga. Angade ripengskana krachaani pal segipanasas krachaskaenga.

Norime:- Maidakana setangnara krachanokai?

Ringanchi:- Oh, na'ade angni segipani gimin kattako bon'e aganode aiao inmanpilgen. Angade mi-bijak song'naba changpaja aro baras kancha sure on'paoba talatja. Gipin segipa gita dakode angkodoknaba, sainaba dongachim, indiba da'nang biade antangan basakobaras dakaia aro angnaba skijojoiaia.

Norime:- Indakode na'ade rasong gnanngbeen indakgipa segipakomana.

Ringanchi:- Rasong gnanng inana agre maiko agandapakugen.

Norime:- De, na'a roaibojok. Angade da'o mande grongna nanga donga. (*Chakate re'anga*).

Ringanchi:- (*Mora gegniko nokningchina de'bae*) De, indakode re'angskaiboha, angade inon nirikaignok. (*Nokningona napon segipako nika del'dik dake*) Aia, na'a re'bajokchimne. (*Kalim mikrono mikchi singsola gnanng tuaoni anpile nie sko narongrenga*)

Ringanchi:- (*Krachaa aro kenani bimangko ra'bite, a'chi-ko nikome*) Da'al dipet anga darang mandenaba nang'ni gimin agantaijawaha. Uni gimin ia changsamangmangnade angko kema kapakubo.

Kalim:- (*Mikchi ipake*) Na'a angna mamung dosikoba dakkuja, angasa nang-na dal-bea dosiko dakaha. Anga nang-ni segipa ongeba nango indakpile ka-dongna man-jachim; indiba nang-ni kakket onganichi aro angna ka-sanichi da'alo anga jikgipani gamchataniko uriaha.

Ringanchi:- (*Gisiko katchabeaniko mesoke*) Anga rasong gnangbee nang-gita dakgipa segipako mar'e maina nang-na ka-sajawa.

Kalim:- Na'a ongja, angasa rasong gnangbee nang-ko jikgipa dakna manaha.

Ringanchi:- (*Ka-dingsmite*) De, indake ong-ode an'ching sakgnian rasong gnanggipa segipa aro jikgipa onga. Uni gimun hai damsan mi cha-naha. (*Sakgnian mi cha-na napanga*).

DOGA CHIPA

DAKMESOKANI-II

GITTAMGIPA NAKATANI

(Biap: Kalimni nok; Attamni sni bajimango Kalim apalchi onkatangaoni nokona re-bapilaha. Ringanchi mi-bijak songgija-changija tusisoengachim).

Kalim:- *(Nokningchi napange)* Ringanchi, oh Ringanchi, baa na'ade mi-chi songgija-changija da'onaba tusie rokuengama? *(Turamchini onkatbae ballimo mora sale sikdikdik maikoba chanchia gnang asonge dongeaha).*

Ringanchi:- *(tusiaoni chakate)* Be'en suk ong-jagita dakanasa tusie roatachim, da'oara tujripangsrangakon, (ongkatbae segipani jripjrip asongako nike, ka'o nangengakon ine chanchie, kendinga gnang ka'srokbea kattachi) Na'ade okkribengnokchim da nang. Anga da'o tarake songgalgalatnane.

Kalim:- *(Uni jakko salrike)* Dikdiksa neng-takkubo. Intango sakgni damsan songainadong.

Ringanchi:- *(Sepango asonge)* Nangkode mainaba suk ongjaenga gita nika. Maiba ongama?

Kalim:- Ongakode maiko agankugen. An'ching jatde jatskana ka'saani, dakchakani aro mikkang niani ingipade komimanchajok, tangka-paisa bangjokode, skia-poraia man'kale namkala gadango kam ka'ahaode jatangkon gualaia.

Ringanchi:- Saobarang nang'ko maikoba inama?

Kalim:- Oe, ates ka'na ine anga Opisial saksachi re'angachim.
Napangaoni adha kontamangnade angaba jripjrip sengpajok.
Unomangba sigaret chikapari, songbad badale poraiari dongaia. Una
agan'paoa somoi dongja gipin opisial-chi ra'angbo inesa aganataia.
Ja manode ka'onangatanko rakkirikna amjae jegrikbasrangjok.

Ringanchi:-De, na'ara babachiba re'angna man'aengachimba.

Kalim:- Nangpachin skang re'angachim, biara oppis-on dongja,
bachiba saniba nokchisa tas ka'e roengana.

Ringanchi:- (*Gisiko krachua gnang*) Knal pringo oppis-na skang anga
re'angna.

Kalim:- Naran re'angbebeaibojok oc, aiaa angade jatskani senga
dakakon chakna anja. Haida anga an'tang knal ong'kataina nanga
ong'ode badiaba opisial-rangde man'e ra'naba donga.

Ringanchi:- Na'ara maina gisiko ding'chaoatangko parakronga.
Alamalade chakchike ninaba skipaboda.

Kalim:- Chakchikede nipaengachim indiba salriknan manteljaode
angaba maiko daskapagen.

Ringanchi:- De, na'ra au-miksue gansre-chinsreebo. Anga wa'al siksona.
(*Ringanchi song'chakramchi napanga aro Kalim au-na re'anga*).

DOGA CHIPA

DAKMESOKANI-III SKANGGIPANAKATANI

(Biap: Kalimni nok: Kalim kamna porikka ra'aha aro ua ia somoio kam ka'china lekka seatgipako ra'e o nokona kusi ong'bee re-baha. Jikgipa noko miattam songna mibima basesoenga).

Kalim:- *(Kusi ong'bee jikgipani merong baseako raseke)* Ringanchi, hai iachi rebacheng.

Ringanchi:- *(Jjajrenga aro nawang daka gnanng)* Maina, mai onga?

Kalim:- *(A'o meronggnang ruanko done, an'tangni kek ra'batangko chakku-chi rate, jako charani gildengsako ra'e)* Ha, wangbo, duatna.

Ringanchi:- *(Ku'sik ku'ange, segipani duatako charjoljole)* Iara mainigimin maiba kusini kobor dongama?

Kalim:- *(Kam ka'china lekka seatgipako bikote)* Nibo! Ringanchi, anga sorkarini kamna porikka ra'e chu'sokgipa ong'aha. Knalonin ka'echina lekka seatjok. Iakai lekka.

Ringanchi:- *(Ranggitik mikchi gurakhuako ipake, jak-ko segipachi snile, salam kare)* 'Katchaani ong'china'.

Kalim:- *(Nawang dake)* Mitela, indiba na'ara maina grapskaenga?

Ringanchi:- Mamungba ong'ja ian katchaani mikchisan. Anga da'alo nangni indakpile kusi ong'ako nike, ia nangni katchaanio mikchi grake bakrimpaana agrede gipin dake gisiko sikpaaniko parakna man'ja.

Kalim:- Nibo, Ringanchi manderangde indakpile member-rangko rim'taitaie, tangka-paisa galpile kamna dakoba man'jaenga, indiba angade altue man'jok. Ian an'ching sakgnina Nokgipani dal'begipa patiani ong'chongmota. *(Ringanchi sko narongrengge segipako*

mikchidingding nitata) Na'ara maisa ong-skaenga? Angni kusi ong-bee golpooba da'alde mainasa kumagita dongenga?

Ringanchi:- (*Sko narongrengtaie*) 'Inghing' (*chakate ruan koldoa*)

Kalim:- (*Ruanko ra-sektaie*) Na'ara mai ong-chongmotenga, de angnaba aganpaboda.

Ringanchi:- Mamungba ong-ja na'a. Angade nangni indakpile kusi ong'anasa suk ong-chakpilskaenga., maina na'ara ianamangmang indakpile an-sengskaenga?

Kalim:- Aiao, na'ade me-chikde, Nokgipani ka-sae patiakoba churongnikjama?

Ringanchi:- Churongnikgijani ingipan angni gisikode dongskaja. Indiba mandeo bil gnangode maikode dakna amjagen. Uni gimin na'a dugapile katchanabe aro jeko man'ahade man'aha unon gisik pangkimpabo.

Kalim:- Oh, na'ara ianasa dasionin chanchie suk ongjabengama? Nibo angni ka-sabegipa jikgipa anga nang-na ka-saesa kamna galaha aro dao uko anga man'aha. Iani kosako angni gisik pangkimgijani gimin na'a singaniko daknan nangjawa, indiba angni jatna ka-sae re-mikkanganiosa angko ja-donggaatpanabe.

Ringanchi:- Aiao, andalangengjok, anga merong basenaha. Intangode mikmik-gamik dakainok. (*Kalim jrimjrim nirika aro jikgipa ruanko de'e apalchi ongkatanga*).

DOGA CHIPA

DAKMESOKANI-III GNIGIPANAKATANI

(Biap: Ringanchipani nok: Ringanchi pagipamangni nokchina re'anga aro uno Pangkimba antang nanga kamrangni gimin uano golpoe rosoenga).

Pagipa:- Nang'sede kamchi re-engjokma?

Ringanchi:- Im, mejaloni dipet re-engjok.

Pagipa:- Biara anchingni bina tangka due kam dakatakode uijakonba?

Ringanchi:- Inghing uija, batesa sakgipinrangkosa tangka due kam sandioba manja; indiba. "Angade mitchigipa kamko kagijan manaha" ine kusi ongenga.

Pagipa:- (*Kadingsmite*) Baoniko da'o ia chasongo tangka du'gija ariri kamko mangen, gimikan tangkanasa tangka pilak kamkon daktokenga.

Pangkim:- Aiao, ia mandeba kakket daka inoba dugapilbebea. Angade binbaksa rojokode katta mingprakprakkon simsakesa agana. Mejao angkoba kamna porikka ra-na re'ango tangkarang due niama ine singa. Angaba du'a du'ade indiba uko janapoba intektekkugen ine tol'e aganaijok.

Pagipa:- Da'on bia u'iangainok. Nokna koros ka'e tikatjajokode, bi'sa desa bangjoko tekkie cha-na nangjokode antangan skia man'aigen.

Ringanchi:- (*Asongaoni chakate*) Baba angade re'ainokon.

Pagipa:- Nangmako grongangjajokwane?

Ringanchi:- Oe, grongangnade sikachim aro gualemangba Kalimnade bini interview-na member rimako uia tpanabe ine aganasa re bapaachim, da'oa na songan angni mikkangon ang' segipako matnangtokaia.

Pagipa:- Da'ora na'aba segipani ja'kukon ja'kol sanna amsrangengjokne?

Ringanchi:- Oe, anga seni-pani chanchia baksa melie chanchijaode maikai gisiksan onge nokdangona tom'tomaniko ra'bana man'gen. (*Magipa nokningona napaa*).

Magipa:- Aia, nono re'bachimne?

Ringanchi:- Oe, ai angade re'nasa ampilengjokchim. Nang'ko grongangna inesa sengaengjok.

Magipa:- Nokode namchimtokengakonba?

Ringanchi:- Namengaba ai, angade re'skainokon. Haida Kalimba re'baengnaba dongaha.

Magipa:- De indakora.

Ringanchi:- Na'a robabone Pangkim, angade re'skainok.

Pangkim:- De. (*Ringanchi dringoni ongkatbaa aro Pangkimde rorika*).

DOGA CHIPA

DAKMESOKANI-III

GITTAMGIPANAKATANI

(Biap: Kalimni nok - Kalim kamchini sokbae ballimo asonge Ringanchiko sengsoa. Ringanchi pagipamangchini re:bapila).

Kalim:- *(Ringanchiko nisoe)* Bachi re'anga?

Ringanchi:- Aratanasa Norimechi roanga.

Kalim:- De, cha rue ra'abora.

Ringanchi:- Cha-an ka'sinpilenggnok, ding'atna nanggen.

Kalim:- Anga da'o wal'kio channe donbaaba, ding'enggnokon de, niebo.
(Ringanchi re'ange segipana aro an'tangnaba rue ra'bau).

Ringanchi:- *(Sepango asonge)* Ha, ia cha.

Kalim:- *(Rachake ringjoljole)* Da'alde bilsisa batpile bikotgija dongchipgipa lekkarangko balrurue sandiemung anga songni manderangna kam ka'e on'ata. Aiao, da'nang rit Chadok rit hasnimangmang mara nanggninan salsisi bilgri jakgri til'til tal'tal dake budepa buchumarangko japa kitik champile re'ruraatdamenga.

Ringanchi:- Opisial-ara mamungkoba aganja?

Kalim:- *(Cha-ko groksa ringate)* Maiko aganpagen biara, angaba ong'gijako dakengara ongja.

Ringanchi:- *(Cha-ko done Kalimko ka'dingsmite nitate)* Oppis-ni manderangde nang'kode kakketket dakanan nawang inpilenggenkon.

Kalim:- Iarangde mamungan ong'kuja, da'ode mikkang mikkangchiba darang ka'rimskarangba niamni apalo dakna aro je mandeni kamkoba

ja donggaate dondamna manjawa. Niamde niam angade mandean kakket-makketo kam kagipasa.

Ringanchi:- Nangko karimska manderang mikbue kal'akskajokode?

Kalim:- Anga mamung ong'gijako dakja ong'ode bisongara maio pangchake kal'akna manpanoksa.

Ringanchi:- Aiao nara indakede chanchipanabe, mandede jegita kakketo re'oba, changsade changsa ja'gutelaia.

Kalim:- Oe, nang agana gita jaguanide banga. Dasion nibo na'a, 'Babu, chinga cha ringnade donanggenba' inerangsa songni manderangba ropna abachengtokaia.

Ringanchi:- Na'ara ukoara rarikama rarikja?

Kalim:- Rarikjaoba lekka mitaprango siksepe chelaosa 'Uano cha ringna donangengane babu' ine inangtokaia.

Ringanchi:- Indakode da'si babani aganamungan na'ade apsanangengjokne.

Kalim:- Da'si, babani aganamung.....! Hing, basako da'sio nang' baba maiko aganjok? (*Ringanchi kusik rimtipe a'achiko nikoma*). Behen, anga nangpani daka kamrangko namnikjae bisongchi re'ja-doja, indiba na'ade bisongni demechik ong'ani gimin machipachide re-bo-dobo. Ukoara na'ara mainasa Norimechi re'anga ine tolskaengjok? Angan Norimekora ramao me'su palako nikbaenga.

Ringanchi:- (*Ka'dingsmite nawang daka baksa*) Norime ramao me'su palenga!

Kalim:- Oe, na'a. Biara awilli dake amikbrang rogipa Rakkalko rajokba.

Ringanchi:- Aia, iara jarira maidakakosa rajokai.

Kalim:- Jenaje namnikatangkon rapaenggen. Hai an-chingara auna rechengnokma?

Ringanchi:- Hai re-boda. (*Sakgnian barra cholarangko rae chiakolchi ongrkatanga*).

DOGA CHIPA

DAKMESOKANI-IV SKANGGIPANAKATANI

(Biap: Kalimni oppiso: Chadamberanko dilgipa Jengku aro Bakkam, Kalimni oppis-ona rona re-baa).

Jengku:- *(Dogacholo naue, ka'dingsmite)* Babu, chinga napna manpagenma?

Kalim:- *(Sejojole niatemung)* Oh, napachimboda. Asongchimbo, mainaba re-bachimama?

Jengku:-Aiao dilgipa gitcamkoa bachi galgen inesa nangarangko golpoe rona re-baengachim.

Bakkam:- *(Asonganiko sale asonge)* Na'ade kam bang'achimkon. Nang'kosa dondikata gita dakaijok.

Kalim:- Oppisjokona kamde ka'a ong-ode bang'aia, indiba mamung ong'jaba. Da'ora mai kobor na'songara?

Bakkam:- Koborde namsranggijade ong'ja, pangna ong rongagitan ong'enga. Indiba da'oba Kangkri A'dingo chi teng tarina man'gipakoba matchotgijan tangka oke cha'taimanjokna.

Kalim:- Sawa ukoara man'achim?

Jengku:- Sawa onggen Jakkam-maangni dolan uade.

Kalim:- Ia Jakkam-de gimik kamon indaken daksimaigen. Maidakgipa mandean ong'pila iara. Na'song injinial-chi re'ange nija.

Jengku:- Uchinian da'o jegrike re-baenga.

Kalim:- (*Mande okamani kontako rengtengata*) Unoara biara maiko aganchaka?

Bakkam:- An-tangni ningo chonbatgipa kam ka-giparango dosiko gale aganana agre maiko agangen.

Pion:- (*Dringona napae*) Mainabachima, skigipa?

Kalim:- Cha kap gittam ra'ebo, oh, kap bri ra'bae na'aba ringbo. (pion ong-katanga) Uh, a-songtangni silro-ro-namrorognikon indake cha-bokode maiko maidake agankugen. Atcha, da'o na-songni eleksinna wenara mai rokom, manderangni ku-rangrangde nambrangengama?

Bakkam:- Da'o kakketde namade namaengachim, indiba ia kosak jolchisa mni salo Dijeng-sa Akrem-ni mande-rang baksa chu peke re-ange chingade Brenjani dolonisa ine tole songoni achak aro do-orangko skatang doke cha-batokanakon. Mejalo Brejani wenangode nokmaan nokchaksojajokna.

Kalim:- Dijengara sachisa, Brenjachi ongjane?

Bakkam:- Mejarangode chingchianchim indiba bikoara tangkachi brejokde, da'ode bian a'birangchi tangka boe boe Akremna puronchina manderangko breenganaba.

Kalim:- Aiao, archingni jatoba da-alonakingkingba tangkana mikpakma nie an-tangtangna dilgipako seokna man'ani bilko palgiparangba dongbebekuenga. (*Pion cha ra'baa aro sakprakprakni mikkangona de'e donata*)

Bakkam:- Oe, unan chingade ia bilside parak-pasakan wenna amsrangengjok.

Kalim:- Ringatchimbo (*Cha-ko detome, kursa ringate*) Maiko dakgen saksanade saksa parak-pasakan dakna nangaignok, indake nie roaiode A'chik a-songde bon'aignok. (*Bakkam aro Jengku chako detome ringa*)

Jengku:- Bakkam, knaama, knakuja? Mejal attamo Dikku-kode Akremni manderang doktokanaba. Ia hospitalode ka'dongchakna amjaen gipinchinasa pakwatataijoknaba.

Bakkam:- Ah, angade da'osa knaenga.

Kalim:- Aiao, da'ora an'chingoba bilsisana bilsisa batbat bilongbaroroengjokmo. Da'o Akrem man'ode aro nikubo, ianan batkugen. (*Goriko nie*) Aia, Oppis somoi batpilengjokde hai banoba dokanrango asonge name golpo ka'srangnama?

Jengku:- Hai nambebegebenba, oppis-rango indakarangni gimin golpoade kraaba ong'ja. (*Sakgittaman ong'katanga*)

DOGA CHIPA

DAKMESOKANI-IV

GNIGIPANAKATANI

(Biap: Cha dokan - Jengku, Bakkam aro Kalim cha dokano asonge roenga. Dokan mikkango buchuma saksa kokko mikkango done grapenga).

Kalim:- *(Buchumako niate)* Ua buchumara maina grapengasai, de, Bakkam cha ringchina ianona rimebora. *(Bakkam re'ange rimea)*

Jengku:- Iano asongbo ambi, cha ringbo.

Buchuma:- Aia na'a angsudrang, angade da'alde nokchi jamchi re pilnan sikjaengjok. Uchi budepaba ka'o nangsognok, bi'sarangba migri chigriaignok.

Kalim:- Maikoba olbaachima, ambi?

Buchuma:- Oechim na'a, noko merong dongjani giminsa e'ching pale brepana ine bilbapachim. Akremni tangka sualenga, nangni bimungba dongpaa intang attamo ra'bo inanasa antangni e'ching palani tangkachia bi'sarangna chola bara ra'jok. Dao attamo re'ange niara na'ade Brenjani mandesa ine on'atjajokwai. Bara cholako walpilna inoba anbajrake palgipanikosa ra'e rorikon nikjajok.

Kalim:- Aiao, da'ora indakerangba daktokengama? Mamungba ong'ja ambi na'a duk man'abe. De, cha ringchengbo. *(Chola jeponiko tangkako bikote gong ritchasa sotbonga chane)* Ha, ia ambi merong ra'angbo.

Buchuma:- (*Cha ringgija tangkako rarchake jakko chopjole*) Aiao mitelbejok atchu, angade walangengjok chakode ringjajokwa. (*Buchuma unoni ongkatangaha*).

Kalim:- (*Denggoke mikchi ipake*) Aiao, A'chik a'songde da'ora maisa ong'angengjok! Amani rongjanggina dikbusruo merong jakkemsa donmangmangakode gosresrana nangjachim!

Jengku:- Da'o na'a ianamangmang indakpile duk man'enga. Nang'ko chinga skangonin unan sorkario chakkri ka'nabe ine aganpachimba. **Na'a A'chik** jatna ka'sagipa a'song-chigatangni ong'sianganiko ka'dingsmite nie rona mangen ine ka'dongnikachima?

Kalim:- Oe, beben ripeng, da'o chakkri ka'en anga jatna mamungkon jaggitele dangdikna man'jaengjok. Pilakko dakna inoba mamungon engtojaenga. Indiba anga ianpakde Akrem-ko ganggilate Brenjako watatskana kam ka'ja ong'ode angni bimungba Kalim ong'jawa. (*Unomiting me'apa sakgni botolko oko sike uko go'olchi 'teng', 'teng', ine doke uamangni roenggipa dokanona napaaha*).

Bakkam:- Jengku, uarangko niat. Da'sio bisongan mama Brenjaniko gilja konta brena ine tangka bi'bagiparangbamo. Da'ora nibo', asol kontakosa oko chipe dokskaengjok!

Jengku:- Aia, bebemo. Anga re'ange singenane?

Bakkam:- Indiba katta namgijakode aganbanabene.

Jengku:- (*Re'jojole*) Aganja na'a. (*Sepangona re'ange*) Oh, apadrang baosa na'songni giljana konta bregipade?

Me'apa saksa:- (*Botol-ko ra'ongkate go'olchi doktengtenge*) lanba.

Jengku:- Aia, na'songde papnaba kenjama?

Sakgipin meapa:- (*Rake kadinge*) Ha, ha, banoba politiks ingiparango pap ingipa dongama? Iaba mingsa politiks ine u-ijama, ang-jong? (*Jengku mamungkoba aganchakgija wakidikdik dake reangpilataha*).

Kalim:- (*Sko narongrenge*) Uh, hai re-gnok. Angade sko sadikbaengiok. Na song intango angchi napakjolangtokbo, angaba da'alde wena ka gen.

Jengku:- Ah, de indakode, intango chinga repakangjolna. (*Watgrike reangtoka*)

DOGA CHIPA

DAKMESOKANI-IV GITTAMGIPANA KATANI

(Biap: Kalimni noko - Kalim noktango jikgipa baksa golpoe Jengku aro Bakkamko sengsoenga).

Ringanchi:- Baosa nang' ripengrangde re-bajahakonde?

Kalim:- Bisong angona re-bajajokode sachi re-angskana. Mejaonin ang' ong-katakosa senge dongtokaengo.

Ringanchi:- Angade nang-nade maiba dakchakade, maidake na'ara sorkari chakkri ka-gipara eleksinna wennokai.

Kalim:- Angni a-songtangna sasonni bidingo dilgipako seokna angongongipa bilko sawa dokpengna man'gen. Angaba A'chik jat saksa onga, angaba antangni namnikgipa mandeni sasonni ningosa donggen. Anga angni somoigita kamko ka'e, a-gitchaa somoio jakgitele jekoba dakna man'an nanga.

Ringanchi:- Na'a dao jena ka'enga ua man'ajokosai.

Kalim:- Bian man'gen, maina man'jawa. Da'ode an'chingni A'chik jatoba uri-urigijagipa manderangara bang'ajok. Bigita dake gisik matsramgipa, kamna cholikalgipana pu'unjaode sanasa pu-unto'knok.

Ringanchi:- Manderangde Akremkosa man'gen intokengake na'a, ka'ode man'agipana ka'srangon namachim.

Kalim:- Bani Akrem, bani Chikrem urija angade. Na'aba uria anga A'chik jatna ka'saa aro ia ka'saa ingipakoara sanalachisa paraka. Uni gimin jatko cha'bokgipa manderangnade sasonni bidingoba angade sanalani gisikan dongaia.

Ringanchi:- Sawade kakketo ka'gen, gimikan manjokode apsantokaigen.

Kalim:- Kakketo ka'jaoba, jatna chelchakgipa aro kamna choligipakosa nina nangaba. Jebasi manderangni tol'bingbangana, cha kap-sa ringmanana name chanchichenggija daken A'chik a'song mai ong'enga. (*Jengku aro Bakkam sokbaa*).

Jengku:- (*Doga doktike*) Nokma dongamasai?

Kalim:- Im, dongaba, sawa Bakkam-mangma? Napaboda.

Ringanchi:- (*Chakate*) Nape asongchimebo. Nokan chingade suru burusa.

Bakkam:- (*Asonge*) Aiao sawade abi, gimikni nokan apsanaiake.

Jengku:- Aiao, ripengskarangmangmangba rimbapaoba biara tangkakon on'jade ine chaktokaia. Una, biora tangkaan dongpaja inoara, 'tangkagripagipasa M.L.A chakatama?' inerangsa agane galtokaia.

Kalim:- Im, ki'sang sko sagija tusie dongenggipa chadamberangkoara maiko agangen. Ambino rori-rangni dokkol ka'ako manjokosa uitokgen.

Bakkam:- Hai, ong'katskainahama?

Kalim:- (*Ringanchi-chiko nie*) Baosa cha dakatjama?

Ringanchi:- (*Chadenge*) Asongan ru'utkujanasa angade asongeropaengachimai.

Jengku:- Ringiawa abi, donaibo. Da osamangmang Bakkam-mango mi cha'baa.

Kalim:- Hai indakode re-chimainaha.

Jengku:- Roskaiboha abi, chingade chakatskainok.

Ringanchi:- De, basakoba re-bataio cha-kode ringchimskaibojok.
(*Sakgittaman Ringanchiko noko saksan done re'anga*).

DOGA CHIPA

DAKMESOKANI-V

SKANGGIPANAKATANI

(Biap: Kalimni noko – Lekka pure dilgipako seokani badeaha aro da'o chananiko matchote susaanio chusokgiparangkoba parakmanaha, indiba Kalim jena kam karachim ua chusokjaha. Dao Kalim sikdikdik asonge duk man'beenga).

Ringanchi:- *(Segipani sikdikdik saksan asonge duk marako nike, sepangona re'bae)* Hai mi cha'bojok na'ade da'alde Oppis re'angjawama?

Kalim:- *(Skoko rime narongrenge)* Inghing, da'alde angade mamungkon daknan sikjaenga.

Ringanchi:-Maina na'ara jaljeni minister onggninara indakpile chanchidamenga? Man'paa ong'ode nang'naba rikwakwake on'atpagenchim inosa.

Kalim:- Aia, na'a me'chik jrip dongbo, belbel dame angko sko saatdamnabe. Na'a mamungkoba sasonni bidingo on'tisaba chanchie nian dongjaesa skatang belbeldamenga. Dao ia chango Akrem-maang maidakgipa dengguni kamko dake man'angaha aro mikkangchi maiko dakangkugen uko na'a u'ija.

Ringanchi:- De, na'a da'o uarangni gimin u'ieba kam bademanahaora maiko dakna man'kugen?

Kalim:- Oe, mamungkoba dakna man'ade man'jawaha, indiba basakona anga ia mikgitokrangni a'doko mikgrigita jripjrip mikchipe rodamna man'gen ukosa chanchienga.

Ringanchi:- Mikgrirangkoara mikgrien dongna on kuaiboda, jamano gitchia nangkama cha tote nikjoko an tangtangan mikgaotokaigenba.

Kalim:- Basako an chingni manderanga mikgaogen? Angni jajrengsoanide daalni aro knalni giminde ongja, ia pilak an chingni nikeba nikgija, urieba-urigija dake an tangtangni salgnini kusina dakani bal-bojakode an chingni dedrang-sudrangsa manrikgen.

Ringanchi:- Meja pu onna skangskangde manderanga Brenjakon mangen intokachimde, da ora maidakesa manrikjajok!

Kalim:- Bikoara cha bokgipan pakmajokde, aro bon kamao Akremara song songchi mande wate tangka bangen satjok.

Ringanchi:- Tangka ra'e, ra'e pu ongiparangba agreskapilbebejok oe. antangtangni lekka puone a songtangna dilgipako seokna manani bilkni gamchatakon da onaba urikugijagiparangba bangkuenga.

Kalim:- Antangtangni lekka puone a songtangna dilgipako seokna manani bilko tangkana palgiparangde mongsongbate jillao songdonge skia-poraia mangiparangan ong'bata. Gamchatgipa lekka puonani kingsako tangkana palaniara A-chik jat gimikko pale cha gipa baksa apsan onga ine darangba uitokjakon! (*Jengku ranggitik tarake re'bae nokningchi napaa*).

Jengku:- Baor Kalim dongama?

Kalim:- Mamasa sikket bakket dake da'alde angko sandienga. Maiba ongama?

Jengku:- Aiao, nangnade namjabejok. Mejao an chingni eleksinna wena-o jawilwat tarigipa kesetko saoba chaue Akrem-na on'eana. Da ora nangkode kamoniko ra'galna amengjokna. (*Ringanchi*

*ranggitik mikchijingjang jingjang dake, sko narongrenge
nikningchi napanga).*


Kalim:- (*Ringanchiko nirike antangba sko narongrenge*) Indake
ong'ode angko kamoniko ragalna skang anga antangan kamoni
ong'katsogen.

Jengku:- Kamoni ong'katna skangba senge nichengkubo na'a.
Ong'jaoba Akremchi re'e dakpajachina mol'mole nibo.

Kalim:- Anga mamung saloba, angna je ong'genoba bobilna sko
choknoke on'jawa. De, na'a re'angaiboha.

Jengku:- (*Kalimni suk ong'gijako nike*) De, indakode. (*Kalim
jripjrip asonge chanchirika aro Jengku chakate re'anga*).

DOGA CHIPA



DAKMESOKANI-V

GNIGIPANAKATANI

(Biap: Kalimni noko - Kalim mamungkoba Jengkuni aganagan kosako gipinchi singdape nigijan kamoni ongkataha. Dao ua jikgipa baksa noko asonge jripjrip kumagita dongtokenga).

Ringanchi:- Da'alde na'ade oppis re'angjawane?

Kalim:- Angara mejalonba lekka see kamoni ongkatbajokba.

Ringanchi:- Gipinrango singdape nigija na'ade Jengkuni agananan gisik ding'aramram sengsrapgija watbajokma? *(Segipani ningtubee chanchie jripjrip dongana suk ongchakjae uni sepangona jithae)* Na'ara maina iana ningtubee chanchienga. Ango angni me'tramitingo tangka chimonggipa aditan dongkuenga. An'ching da'oba uachi chona-remama kamrangko dake janggi tangani cholko a'bachengtaina man'gen.

Kalim:- *(Jikgipachiko nie)* Chona-remama kamko ongja. Angade da'ode jatko cha'boke dal'a kamkosa ka'na chanchienga.

Ringanchi:- Na'a jatna ka'sagipa mande maikai jatko cha'bokna man'gen? Da'o na'a gisik ding'a ding'a chanchiesa indake aganenga. Knal-sotnion na'a jatni ong'siangako niktaijokode an'tangan an'tangni kamna sikimtaigen.

Kalim:- Anga namen chanchijok, indake ongjava. Tol'a inode nisobo, da'al an'chingchi sawa re'baenga. *(Uamangni golpoengmitingo Jakkam ukil saksako rimbite re'baaha)*

Jakkam:- *(Dogacholo naue)* Nokma dongama?

Kalim:- Ah, sokbajok, nape asongchimeboda.

Ringanchi:- (*Jakkamko niksoarin mikrengreng nie*) Angade sko sabaenga, na song golpochimaibo. (*Nokningchi napanga*).

Jakkam:- (*Ukilchiko nie, una Kalimko mesoke*) Skigipa, bian Kalim. (*Kalimchiko nie, ukilko mesoke*) Bian Rakseng ukil. (*Rakseng aro Kalim salam ka'grika*). Hai an'chingara kamni gimin golpojolainaha.

Kalim:- Hai a'bachengroataibo.

Jakkam:- (*Segimin lekkako bikote*) An'chingni songo da'o nokma boldokni a'king dongkuenga. An'ching ua biapranoniko nokmarangna banga bang'gija tangka on'e bolrangko ratgen aro wa'arangkoba den'e a'song gipinchi watatgen. Na'ara iarangoara namnikgenma?

Kalim:- Im, namaigenba.

Jakkam:- Iani ja'mano, mongma wagam, matcha bigil, mapil bikit dakgiparangko aro uarangsang on'gaigija e'ching, sala, jal'lik gisi indakgiparangkoba ianoniko dam sikchepe ra'e dal'dalgipa mahajonrangko tik ka'e watatgen. Na'a iarango mamung nengnikaniko nikjaode damsan dakrim-ka'rimna gita ukilni mikkango soe ka'bo.

Kalim:- Im, on'gaigen. Bao soe ka'na nanggipa lekkara bao ? (*Ukil bikote on'a aro Kalim soe ka'a*)

Jakkam:- Him, da'ode an'ching ripengsang ka'rimgipa on'gaha (*Jakko snile Kalim baksa salam ka'grika*) lade da'o a'bachenggipasa, ja'mano ka'sin-ka'sine anga nang'naba skijoljolgen, aro ka'an' budi-koba bikotjojolgen. Nibo, na'a skangoni angona re'bae iarangni gimin janapode na'a da'alde raja saksagita janggi tangna man'enggnokchim. (*Kalim ka'dingsmite gakgue donga*).

Jakkam:- De, da-ode an-chingni kam matchotaha. Knalo na-a angni nokchi re-angbo. Knalonin an-chingni kamko a bachengatainaha. Anga da-o injinialchi napna nangenga.

Kalim:- Cha-mangmangkoba ringangjawahane.

Jakkam:- Tangka-paisani kam-ode cha-a-ringanide kamni jamanosa. De, re-ainok (*Chakate ukil baksa re-anga*).

Kalim:- De, indakode (*Dogacholona re-ange nirika*).

(*Kalim walgimik antangni daknasienggipa kamna tusipilgija chanchibeaha*)

DOGA CHIPA

DAKMESOKANI-V

GITTAMGIPANAKATANI

(Biap:- Hospital dringo - Kalim pring sengahaon jikgipako mi bijak songate, damsan chare, Jakkamni nokchi re-angaha).

Kalim Jakkam-ni nokona sokon adita golpoe roani jamano cha onrako ku-sa ringmanarion asongaoni aona gitiigropaha. Jakkam uko hospitalchi ra-angaha aro ua da'o pallango sarigri tusienga.

Jakkam:- Baosa da'onaba jikgipachi rikkanggipara sokbapilkujama?

Jengku:- *(Mikchi usite)* Da'sion sokbajoke.

Jakkam:- Baosa jikgipade re-bakujane?

Jengku:- *(A'chi-ko nikome pallango asongaoni nichaoe)* Jikgipaba sijokna.

Jakkam:- Jikgipaba sijokna! Hare, maidake da'ora sakgnian indake ong-aha? *(Kalimni mikchiparian skoko rime grapako nike)* Ha. Kalimde janggimangmangde tangkuengpiti!

Ringanchi:- *(Jabirongchi re-bae)* Kalim, hai an'chingara ia mikgitokrangni adokko wate damgipin agilsako songdong a'chane renaha.

Kalim:- *(Mikjrao dake tuketchia gnanng anpile, jagringko nidoe)* Ringanchi, da'omangmangsan nangkoa sijok ine knasoahachim, indibe da'oa na'aba tangkuengama?

Jengku:- (*Nawang dake niwingwange, Kalimko sikjengjenge*)
Kalim, oh, Kalim, bao ianode Ringanchi dongjake!

Kalim:- (*Jaksi ore*) Iakai, angni skopongo chadenge angmung agangrikengaba. Biara angko rimna re-banaba. Aia, na-songara saksasakgni ongja, jinmaan nachil nagoka baksana gimikan mikronba kana ongsrangtokjokma?

Jakkam:- (*Nawang dake niwingwange*) Bao Ringanchi? Chingade nikaba nikja, ku-rangkoba knajake.

Kalim:- (*Pile jikgipachiko niate*) Ringanchi, angni ka-sabegipa jikgipa anga nangni agana gitan jatko cha-bokna gisikan siktelja. Uni giminsa maiko dakgen chanchibeoba cholkon nikteljae an-chingni da-sipring cha-gipa mio bisiko pu-dapaha. Na'a angko iana kema ka-pabo.

Ringanchi:- Naa angni bebegipa segipa ongan giminsan angko a-sako saksan watangna kapakesa na'a iako dakaha. Uni giminsan angaba nangko ia mikgitokrangni a-doko saksanko donangna nangnikjaesa da'o rimna re-baha. Hai, ang' baksa re-boha.

Kalim:- Beben, angaba ia Mikgitokrangni A-doko dongen mikgitok ongpana siahachim. Hai angni ka-sabegipa jikgipa nangni jakrangko anghina snilate angko salchrobo. (*Jak samgniko de-doe, uko ranggitik galonpilahaon un' kursik jripjrip ongaha*).

Jakkam:- (*Sepango asonge, uko sikjengjenge*) Kalim, oh Kalim. Kalimba da-oara sisrangha. (*Mikchi ipaka; unomiting Bakkam, Pangkim aro Singkam dringona napaa*).

Jengku:- (*Ripengskaranko niksoe, mikchi jingjang jingjang dake*)
Nibo ripengrang an-chingni ripeng Kalimde siaha.

Bakkam:- (*Mikchi singsolbaengako ipake*) Oh ripeng, na'a antangan jatko dilgiparangoni saksa on'ge da'alo chingna ka donganiko ra'bani pal batesa jajrenganiko maina dake donangaha?

Jakkam:- (*Bakkamko apalchina rimsrukange*) Jonggipa nogiparangnasa sanon kobor on'atgnoksai ?

Bakkam:- Da'sio knaarian angan mande watatjok. Angade a'sel onga manchakoba namede talkuja. Mai ong manchaa?

Jakkam:- Pringo angni nokchina re'anga. Adita angmungan golpoe roani ja'mano cha on'ako ku'sa ringmanarion asongaoni a'ona gitilgropa. Mai man'cha on'ga uko hospitalona ra'bae daktolrango singe nioara bisi ringchapmana ine aganenga. Da'ora angnaba nampiljaengjok.

Bakkam:- Mamungba ong'jawa . Na'a on'bebea ong'ode jikgipade siskajawachimba. Haida bisong pringo cha'gipa mion bisi cha'chapmanakon ba uandake ong'jaode Kalim antangan sakgnian sisrangna ine dakengnaba mai tik. Hai nokningchian, mamungba ong'jawa na'a, jajrengnabe. Anga nogipa joggipanade talate on'raigen. (*Sakgnian nokningchi napanga*)

Pangkim:- (*Duk man'bee mikchi baksa*) Na'a jekai kakket on'ga, ua gitan na'a da'alo kakketgipa jikgipa baksa a'sakko damsan wat'angaha. Nang'ni agana gitan dal'bea dosko dakgimin me'chikara inditan se-na ka'sabebeakon. Ripeng anga da'alo nang'ko iana mande ra'beaniko agana namnika aro angaba nang'gita kakketgipa jikgipako man'a gita ja'ku de'sretgimin me'chikkosa sandie antangna segen. Indiba anga chanchia, na'a nang' jikgipani nangna daka'nggimin banga kamrangkon urangjaha.

Jengku:- (*Mikchi ipake*) Oe beben Pangkim, abi Ringanchi se-na dangdike on'a aro se-ko antangna ka'saatna changgipa jikgipa saksa

ong-bebeachim. Anga iako uoniko u'ie ra'aha aro uko a'sakni manderangnaba parakna sika. Abi Ringanchi jringnan uni me'tran' salrangona bate me'chikma ongo silbate antangko rakkiachim. Uan abi-ni se-ko antangna ka'saatani dike sammikmal ong'achim.

Singkam:- Ringanchi antangko me'chikmao sile tariachi maikai segipako antangna ka'saataha? Angade iani miksonganikon urijaenga. Me'chikrangara me'traona bate me'chikmao antangtangko sile taribatna nangama? Uan sakanti me'chikrangni dakna nangchongmotgipa kam ine nangni miksonganiara ongama?

Jengku:- Me'chik ingipa sakantian uako dakna nanga inede aganja aro uan dakna nangchongmotgipa kamba ong'janaba donga, indiba adita a'gilsakni me'asarangni gisikoniko angni chanchipe nianiosan ong'ainaba donga. Basakoba badiaba me'asade sakgipin nitobata me'chikko nikode uni bimangtangko mesoke ropachi gisik dingtangataniko man'a. Indiba me'asako gisik dingtangatgipara uamangni gisik ka'tongo ong'ja, mikkang bimangosa ong'a. Uni gimin me'chikrang me'traona bate me'chikmao antangtangko taribatna nanga, jedakode sakgipin nitogipa me'chikrang gisik bingbrangate ropna jotton ka'ona, "Oh, angni jikgipan silkuengade" ine re'sretaoni naljokataniko man'rikkugenchim.

Singkam:- Angni nikani gitade iasan ong'ja, uamang jikma jiksean saksa sakgipinna nengnikgrikaniko ong'ipa manderangba ong'achim. Jikgipa antang se-na silbatoba, man'e cha'gipani demechik ong'oba aro se-ni inditan ka'saako man'oba, ua ka'sanio ga'chate se-ko mandikatgipa me'chik ong'jachim. Uchiba segipaba jikgipani giticham salrangko chobiltaie uni ka'saniko man'e uko dingdoatgipa me'asa ong'jachim. Oh, uamanga mairongpilgipa jiksesa ong'achim!

Jakkam:- (*Skotangko rim'e, rang'gitik chanchipretaniko mesoke*)
Oh Kalim, na'a jatri matgrik man'chanchim. Anga namang jiksesako mande ra'been gopgen aro ango donga kakketchi na'simangni

gopramko nitobee tarigen, aro pile da'al dipet jatna mamung namgijagipa kamko kataijawaha. Hai ripengrang bi-ni manggisiko ianoniko ra'bo aro jonggipa nogipana kobor wat'atbo. (*Jinma de'tome ra'anga*)

(Bakkam, Singkam, Jakkam, Jengku aro Pangkim, Kalimni manggisiko de'tome Ringanchini ma'apani nokona ra'angaha. Ringanchini ma'apa aro maharirang noko dongsoaha. Salgipino pringwalni salnasrapkujaon Kalim-ni nogipa, segipa baksa aro jonggipa jikgipako rime, adatangni manggisiko gopanio bak ra'pana re'baha. Pilak sokna nanggipa bakdrangrang soktokahaon jarikgitcham chadamberang uamang jiksesani manggisiko uamangni maharirang baksa mande ra'bee gopaha.

DOGA CHIPA

DAKMESOKANI-V

BRIGIPA NAKATANI

(Biap: Gopramo - Salgipino Jakkam, antangni kurrachakgimin gita uamangni gopramko nitobee tariatani jamano Kalimni chisol mikkango asongchongchrote jadu sike dongenga).

Jakkam:- *(Singsolhaenggipa mikchiko u-site)* Kalim, anga nang-na iako agana namen jamanchakbeaha. Na'a ia agilsako atchie, ia agilsakni gimin u'ie ra-na namen gualaha. Na'a Brenjana Eleksin-o chakesat indonga a-selo ja-guaha, indiba na'a iako urina jamanchakbejok, Akrem antangni susaanio bobiltang Rokka-ko manchakjana kenesa, chugimik korosko on'e uni manderangko bingbrangatnasa Brenjako chakatatahachim. Iasan ongraija, uchi bang-a nang-ni ripengskarangka tangka man'amangmangsan wenmika daktokaha, indiba iachi na'ade kakketo dake janggitangkon nasiatjok! Mongsongbate dal'bate nang-ni gualanide ian, Jengkuara banoniko knaesa nang-na ua kattako aganskajok, aro na'aba uani gimin tale sandichenggija maiko dakaljok; Akremara mamung dakeba nang-ni kamko bonratna chanchia grichim!

DOGA CHIPA
(BONJOK)
